

REGIONAL NEWS BULLETIN

HEADLINES (MORNING)

1. Larsap Dr. Hari Babu Kambhampati an Financial year hmasa leh tuna hman mek chung hian Mizoram sorkar chuan indonaa sipai boral tate leh ramtuileiloa chhuak chungte hnenah zangnadawmna cheng nuai 12 chuan a pe tawh a ti.
2. Chief Minister Pu Lalduhoma'n Mizoram leh India ramin lehkhathiam, ram leh hnam tana mi tangkai a mamawh a ti.
3. Union Cabinet chuan Kendriya Vidyalayas (KVS) thar 85 din a remti.
4. Prime Minister Narendra Modia chuan hmarchhak te chuan ram hmasawmna turin theihna sang tak an nei a ti.



GOVERNOR

Larsap Dr. Hari Babu Kambhampati chuan Financial year hmasa leh tun financial year kal mekah Mizoram sorkar chuan indona avanga sipai boral tate chungte hnenah leh ramtuileiloa chhuakte hnenah zangnadawmna cheng 12,50,000 a pe tawh tih a sawi.

Larsap chuan kumtin December ni 7 ah rampumah Armed Forces Flag Day hman thin a nih thu sawiin Mizoram Legislative Assembly pakuanaa member Lt. Col. Clement Lalhmingthanga leh TBC Lalvenchhunga te chu Armed Forces mi leh sa an nih thu a sawi.

Larsap chuan Mizoram fa hrin, India ram tana an inpekna leh hnathawh that avanga huaisen lawmman leh chawimawina ngaihhlut hlawh tak tak dawngtute tarlangin Naik Subedar Jeremy Lalrinnunga, Guard Regiment, Gold Medalist, Commonwealth Games 2022 chu Vishist Seva Medal hlan a nih thu te, Naik Lalhmangaihsanga Chinzah, 1st Assam Regiment leh Major Laldingngheta, Madras Regiment-te chu ral hmaah huaisen taka an chet avangin Sena Medal (Gallantry) hlan an nih thute bakah Sepoy H. Lalrokima, 12 Assam Regiment chu ral hmaah huaisen taka a chet avangin Mention-in-Despatch hlan a ni bawk tih a sawi.

Governor chuan Financial year hmasa leh tun financial year kal mekah Ex-servicemen leh an chungte mi 30 hnenah tanpuina 1,58,000 sem chhuah a nih thu a sawi bawk a ni.



TOURISM

Tourism Minister Pi Lalrinpuii'n Tourism department hmalaknain tun thla ni 9 atanga ni 14 chungung International Paragliding Accuracy Championship leh Aero Sports Festival neih a nih tur thu a sawi.

He thu hi nimina a pisa-a chanchinbu mite a kawmna ah sawiin Pi Lalrinpuii chuan Mizoram in Tourism huanga hmalakna ah khawvel mit hmuha an lan theih nan Paragliding a inelna kumina buatsaih a ni tur chu thil lawmawm tak a nih thu sawiin he festival a tel tur hian ram hrang hrang 12 - Saudi Arabia, Kosovo, Albania, South Korea, Spain, Singapore, Malaysia, Indonesia, Mongolia, Nepal, Kazakhstan leh ram chung atangin Paraglider 79 an lo kalkhawm tur thu sawiin, ram dang mi lo kal tur an neih tam ber tum a nih thu a sawi a. He festival chung hian mipui chhimtute tan Paragliding Joy ride a awm dawna, hot air ballon joy ride bakah Nghakuaichiah leh Air Rifle shooting te neih a ni dawn a ni.

Tourism department hmalaknain ni 16 atanga ni 21 chungung Winter Festival, AR Lammual ah neih a ni dawn a. Festival neih chung hian Ruihhlo lama inzirtirna neih tura ruahhman niin Winter Festival hi Aizawl mai ni lovin Reiek leh Hmuifang ah te neih a ni dawn a ni.



Chief Minister Pu Lalduhoma'n Mizoram leh India ramin lekhkathiam, ram leh hnam tana mi tangkai a mamawh a ti.

Chief Minister hian nimin khan Chhingchhip Sainik School Annual Day vawi 8-na a hmanpui a, Mizoram sorkarin kum tin an school tan tanpuina tam tham tak a pe thin tih sawiin, chutianga phur taka sorkarin an school-a tanpui thin chhan chu zirlai hlawhtling tam tak an neih theih nan a ni tih a sawi a, India rama Sainik School zinga Girls Cadet admission nei hmasa ber an ni chu lawmawm a tih thu a sawi bawk a ni.

He hun hmanah hian Chhingchhip Sainik School Principal Lt. Col. Kartik Sood chuan report pein tunah hian zirlai 388 an awm mek a ti a, an zinga 52 chu hmeichhia an ni a ti bawk.

Chief Minister hi School Office Conference Hall-ah school thuneitute nena inkawmna an nei nghal a, School tihchangtlun zelna tur hmachhawpte an sawiho a ni.

Chief Minister hi Bialtu MLA, Minister Pu PC Vanlalruata, Lt. Col. Clement Lalhmingthanga, MLA leh mi pawimawh dangte'n an tawiawm bawk a ni.



BUYER SELLER MEET

Ram hrang hranga sumdawng lian intawhkhawmna International Buyer Seller Meet chu nimin khan Aizawl Falkland a Baptist Centre, ah buatsaih a ni.

Mizoram Agricultural Marketing Board (MAMB) te chuan Agricultural and Processed Food Products Export Development Authority (APEDA) nena tang kawpin International Conclave cum Buyer Seller Meet Baptist Centre hi a buatsaih a, he hun hmanpuitu Commerce and Industries Minister Pu Rodingliana chuan Mizoram lo neitute chu an thlai thar te ram pawn atanga lo kal te ten tam thei ang ber an leisak theih nan duhsakna hlanin, nasa leh zuala an thlai tharte hralh chhuahna kawnga tan la sauh sauh turin a chah a ni.

International Conclave meet ah hian thlai thar pho chhuahna dawr engemaw zat siam niin Mizoram hmun hrang hrang atangin kuthnathawktu 100 vel an kalkhawm a, He Buyer Seller meet-ah hian ram hrang hrang - Russia, Oman, Azerbaijan, Nepal, Jordan, Bahrain, Ethiopia, Saudi Arabia, Singapore, Bhutan atangin mi 14 an tela, anni bakah India ram hmun hrang hrang atangin sumdawng lian mi 31 an rawn tel a ni.



HOME MINISTER

Home Minister Pu K.Sapdanga'n Champhai District a tlawhna ah Zote ram chhunga sawrkar hmunhma pahnih Industrial Training Institute leh Integrated Infrastructure Development Centre te chu a nihna tur ang tak leh tangkai zawka hman dan ngaihtuah a tul thu a sawi.

Pu K. Sapdanga chuan ITI chu thalai kut themthiam kawnga chher hriamna hmun anih theih nan a changtu LESDE Minister pawh a sawipui tawh thu leh tuna luah mektu ralhlante chu Champhai Sub Headquarters YMA ruahmanna angin sawn chhuah tum an nih thu a sawi a, IIDC leh ITI chu sawrkarin tih phuisui a tum thu a sawi bawk.

Home Minister hi Champhai Zote khuain an khaw kum 125 tlin lawmna an kawtchhuahah chawimawina lung an phun sak a ni.

(Lahlpuia PTC Champhai)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



NCM

National Commission for Minorities (NCM) Member Dhanyakumar Jinappa Gunde chuan District Council & Minority Affairs Department hotulute leh sakhaw pathum - Kristian, Muslim leh Buddhist aiawh te kawmin Mizorama NCM huang chhunga minorities ten an dikna leh chanvo an hmuh leh dawn dan chungchang leh hamthatna an dawn tur ang an dawng em tihte a sawipui.

Dhanyakumar Jinappa Gunde chuan NCM dinchhan, hnathawh dan leh bultum tlangpuite sawiin a lokal chhan ber chu Mizoram chhungah NCM huang chhunga awm Minorities dinhmun hre tur leh harsatna an nei em tih hre tura lokal anih thu a sawi a. India Ram Danpui hnuaiyah

Minorities chu tute ber nge an nih hrilhfiahna awm lo mahse minorities dawnkana leh an dikna chanvo chungchang sawi leh ziahlan anih a ti a. NCM huang chung a Minorities tih te – Kristian, Muslim, Buddhist, Sikh, Jain leh Parsi te chu an nih thu a sawiin hengte dikna leh chanvo chu an bitum ber a nih thu a sawi.

District Council & Minority Affairs Department Secretary Pi Sangchhin Chinzah chuan Mizorama mihring cheng za zelah 85 chuang vel chu Minorities an nih thu sawi langin Mizoram dinhmun tlangpui a tarlang a. Council of Churches in Mizoram aiawhte chuan hna lakna Exam hrang hrang leh Sawrkar Laipui programme thenkhat Pathianni ah neih thin chuan Mizoram Kristian te tan harsatna a siam thin thu NCM Member an hrilh a ni.



ASHTALAKHSMI MAHOTSAV

Prime Minister Narendra Modia chuan nimin chawhnu khan New Delhi-a Bharat Mandapam-ah hmarchhak tana kut buatsaih Ashtalakhsmi mahotsav a hawng. Thusawiin Prime Minister Narendra Modia chuan hmarchhak te chuan ram hmasawna turin theihna sang tak an nei a ti a. Kum zabi 21 na chu khawchhak, Asia leh India te hun a ni tih a sawi a. Hmarchhak khawpui hrang hrangte chu ramchhung khawpui dangte nena theihna inang nei ve reng a ni a ti.

Ni thum awn tur he kutah hian hmarchhak mite hnam ziarang phochhuah a ni ang a, thiamthil hrang hrang leh hnam nunphungte an pholang dawn a ni. Hmarchhak state pariatte kutchhuak, kutthemthiamte thilsiam bakah khualzin hipna remchang leh thilsiamchhuah danglam bikte tarlang a ni ang.

He festival-ah hian Rural Haat Bazaar siam niin hetah hian hmarchhak state atangin loneitu leh kutthemthiam mi 320 chuangte thilsiam tarlan a ni ang.

(Newsonair)



KVS

Union Cabinet chuan Kendriya Vidyalayas (KVS) thar 85 din a remti. Nimina New Delhi-a Union Cabinet thukhawm chuan Karnataka-a Shivamogga-a Kendra Vidyalaya tihlen a remti baw a. Heng hmalakna tur zawng zawngah hian cheng vaibelchhe 5872.08 sen a ni ang. New Delhi-a chanchinbumite kawmin Union I&B Minister Ashwini Vaishnaw chuan heng KVS hawn tharte hian zirlai 82,560 tan zirna tha leh man tlawm a pe thei dawn a ti a. Sawrkar hna nghet 5388 siam belh a ni baw ang a ti.

Byte

(Newsonair)



PRASAR BHARTI

Union Minister of State for Information and Communication Dr.L.Murugan chuan Prasar Bharti-in Akashvani leh Doordarshan-te chu tunlai thiamna thar milin a ti changtlung zel tih a sawi. Rajya Sabha-a ziaka zawhna chhangin Pu Murugan-a chuan broadcasting sector lamah hmasawna awm turin policy pawh tunlai thiamna mila her rem zel a ni a ti a. Akashvani leh Doordarshan-ah te khawl changkang leh tunlai berber hman a ni a ti a. IIT-Kanpur nen MoU ziakin Direct to Mobile D2M broadcasting technology an isam a ti bawk..

(Newsonair)

